

重修棗陽縣志卷之十五

雜記 兵事 祥異

定安公壬午秋下江兵與荊州牧戰於上唐遂至宜秋

按後漢書王常傳聚眾數萬人號下江兵王莽遣嚴尤陳茂擊破之常收散卒與荊州牧戰於上唐大破之遂北至宜秋宜秋聚名舊志注卽今寺莊

西漢末新莽地皇三年世祖起兵舂陵進屠唐子鄉

按前漢書王莽傳世祖與兄縯宛人李通等率舂陵子弟數千人招致新市朱鮪陳牧等合攻拔棘陽後漢帝紀進

重修棗陽縣志

卷之十五

兵事

一

屠唐子鄉舂陵故城在縣東唐子鄉有唐子山

西漢末更始元年邛人秦豐攻得蔡陽

按東觀漢記南郡邛人秦豐起兵攻得邛宜城都編臨沮中廬襄陽鄧新野穰湖陽蔡陽十有二縣 赤眉掠唐子

鄉多所殘殺

光武帝建武四年戊子朱祐破張康於蔡陽

按後漢書朱祐傳代征南大將軍岑彭圍秦豐於黎邱破其將張康於蔡陽斬之

獻帝建安二年丁丑曹洪擊章陵

按三國志魏書武帝紀公之自舞陰還也南陽章陵諸縣復叛爲張繡公遣洪擊之不利

宋文帝元嘉二十七年庚寅安北叅軍馬文恭出蔡陽口

按宋書沈慶之傳雍州蠻又爲寇遣文恭出蔡陽口取赤
係塢

北魏孝明帝正光二年辛丑南荊州刺史桓叔興叛降於梁

按北魏書李暉傳南荊州刺史桓叔興驅掠城民叛降於
梁梁武帝資以兵糧令築谷陂城以立洛州逼土山戍

梁武帝普通二年南荊州刺史李志亦以地降

重修棗陽縣志

卷之十五

兵事

二

見梁書武帝紀

唐昭宣帝天祐二年乙丑十月帝引軍趨淮南壬辰次於棗
陽遇大雨頗阻行師之勢

見五代史梁太祖紀

宋高宗紹興元年辛亥二月桑仲自棗陽引兵還襄陽

按宋史高宗紀初仲在京西連跨數城無糧食人相啖欲
引眾北去至是詔降仲爲襄鄧隨郢鎮撫使故還軍

寧宗開禧元年乙丑秋宋兵三百攻寺莊

按金章宗紀八月戊戌宋兵三百攻比陽寺莊副巡檢司

阿里根寺家奴死之寺莊卽宜秋聚爲宋金交界處故金於此設副巡檢焉

開禧二年丙寅冬十一月辛巳金人破棗陽軍甲申犯神馬陂

按寧宗紀吳獵傳以獵爲湖北京西宣撫使獵招神馬潰散得萬人通鑑續編金完顏匡陷棗陽金史完顏匡傳匡遣前鋒都統烏古論慶壽以騎八千攻棗陽破之

嘉定十年丁丑夏四月金人分兵圍棗陽軍五月趙方救至金人敗走

重修棗陽縣志

卷之十五

兵事

三

按通鑑續編金人慶壽分兵圍棗陽軍方檄統制扈再興鈐轄孟宗政禦之宗政午發峴首遲明抵棗陽金人駭遁方聞以宗政權知棗陽軍

嘉定十一年戊寅春二月金人圍棗陽軍孟宗政擊敗之按宋史寧宗紀通鑑續編金完顏賽不花擁步騎圍城歷三月宗政大小七十餘戰金人輒敗

嘉定十二年己卯春正月金人犯棗陽軍京西諸將拒之外扈再興至與觀夾擊又敗之孟宗政又破之鴨兒山金

人遂潰

二月金人復大舉圍棗陽趙方使許國等攻唐鄧以救之

按通鑑續編金人命完顏訛可圍棗陽方計擣其虛則圍

自解乃命國等引兵分道攻唐鄧

六月孟宗政等合擊金人於棗陽大敗之追至鄧州而還

按通鑑續編金屯棗陽城下八十餘日趙方知其氣竭乃

召許國等尅期合戰再興敗金人於滾河又敗之城南宗

政自城中出擊賈勇入金營殺其衆三萬人訛可單騎遁

自是不敢窺棗陽

重修棗陽縣志

卷之十五

兵事

四

嘉定十六年癸未

金宣宗元光二年 宋戰金軍於大湖陂

按舊志宋人攻南陽戰於大湖陂殺金提控朮虎春兒

理宗紹定五年壬辰春正月以孟珙爲京西兵馬鈐轄屯棗

陽

通鑑續編

端平元年甲午命王安國守棗陽益兵飭備

見宋史理宗紀

端

平二年乙未

蒙古太宗七年 冬十月蒙古曲出圍棗陽軍

按元史太宗紀乙未七月二日北軍至唐州棗陽守劉子

澄遁去九月二十三日棗陽告急

端平三年丙午蒙古陷棗陽軍

按元史張榮傳榮從諸王闊端破棗陽通鑑續編棗陽旣破忒木蘇欲阮士人姚樞力與辨得脫死者數十人

元世祖中統三年元攝萬戶齊珪拒宋

按元史齊秉節傳父珪鎮棗陽中統二年攝萬戶事浚濠爲備未幾宋將以兵萬人薄城珪力戰卻之

至元十五年端宗景炎三年戊寅冬十一月以棗陽萬戶府李均撫大洪

山寨爲宋所殺

重修棗陽縣志

卷之十五

兵事

五

見元史世祖紀

明太祖洪武元年戊申秋七月鄧愈攻牛心光石大洪諸山寨皆平之詔降將張德山招撫山寇

見明史鄧愈傳

武宗正德七年壬申春霸州盜趙鏊掠棗陽

按明鑑紀事本末正德七年霸州盜趙鏊眾號十三萬騎五千轉掠襄樊棗隨新野

懷宗崇正六年癸酉流賊入棗陽

見明史李自成傳

崇禎七年甲戌流寇自棗陽至襄陽蔡村渡

見綏寇紀畧

楚撫唐暉發兵防禦

舊志

冬賊掠蔡陽鋪

舊志知縣金九陞潛兵以待殺其渠一字王賊再攻卻之
崇禎八年乙亥賊過棗陽

按明鑑紀事本末八年二月河南賊迫於諸路兵馬其在
南陽者過應隨駐棗陽

重修棗陽縣志

卷之十五

兵事

六

冬十月總兵秦翼明及賊戰於蔡陽鋪

舊志秋九月總兵秦翼明率川兵四千算兵一千駐棗陽
冬十月及賊戰於蔡陽鋪算將劉九思敗走喪卒二百

崇禎九年丙子九月賊走棗陽

按烈皇小識丙子九月老回回等俱東走棗陽官軍追逐
數十里斬首六千餘級羣賊披靡四竄

崇禎十二年己卯土寇焚掠縣境

舊志縣東北十里皆土寇焚掠

崇禎十四年辛巳春三月張獻忠犯棗陽

按明史陳美傳棗陽知縣郭裕甫視事獻忠至時左良玉屯近邑裕單騎邀與共禦賊卻去

崇禎十五年壬午冬十二月賊將劉福攻棗陽

按陳美傳李自成陷襄陽分兵來攻裕擊傷多賊攻益力崇禎十六年癸未春正月朔城陷知縣郭裕死之

按陳美傳城陷裕身被數槊大罵賊支解之闔門遇害崇禎十七年甲申賊踞棗陽

舊志賊將踞棗科派糧料民不聊生迨順治二年大軍平李自成始定棗陽兵火稍息而土寇劫掠至康熙中乃定

重修棗陽縣志

卷之十五

兵事

七

國朝嘉慶元年三月明亮與永保分兵扼賊北逸追至湖河鎮

舊志湖河鎮爲楚豫邊疆在縣北六十里

姚之富犯棗陽復渡滾河而西

滾河縣東六十里卽瀋水

惠齡恆瑞夾攻賊於興隆集斬首二千

竝見聖武記

永保等勦除棗陽宜城一帶賊匪自嘉慶元年八月至二年正月與總督惠齡合勦連得勝仗見二年四月邸鈔

五月襄陽之賊先在鍾宜棗隨一帶屯聚經大兵分勦竄入
鍾祥復由鍾祥北竄焚掠湖河鎮見五年二月邸鈔
諭俱載湖北通志

祥異

齊武帝永明九年辛未義陽安昌縣獲白麀一頭

見南齊書祥瑞志

宋孝宗隆興元年癸未大饑

宋史五行志棗陽大饑斗米六七千錢

乾道三年丁亥冬大饑四年戊子春饑尤甚

重修棗陽縣志

卷之十五

祥異

八

嘉定二年己巳春大饑斗米數千錢人食草木

元武宗至大元年戊申大饑

文宗至順元年庚午大饑有田之家亦多殍死

並見舊志

順帝至正九年己丑夏四月張氏子暴長

元史五行志棗陽民張氏婦生男甫周歲暴長四尺許容
貌異常皤腹擁腫見人輒嬉笑如世俗所繪布袋和尚云
韓林兒傳韓山童倡言天下將亂彌勒佛下生明王出世
至是民以爲驗河南江淮間騷然欲動

明太祖洪武二十八年乙亥唐子山有白蛇赤兔交頸而居

萬曆襄陽志

憲宗成化十三年丁酉穿山甲見於泮池額有田字是年田
紹舉於鄉

孝宗宏治十七年甲子秋大旱

武宗正德三年戊辰穿山甲復見泮池

俱舊志

正德七年壬申夏民婦王氏生子身黑如漆

正德九年甲戌大旱秋蝗大饑

重修棗陽縣志

卷之十五

祥異

九

正德四年乙巳春天鼓鳴地震大饑

正德五年庚午芝產於孝子王雲鳳墓

世宗嘉靖元年壬午春三月地震一日二次

嘉靖七年戊子秋蝗大饑人相食

按通鑑綱目八年御史張祿繪饑民十圖以獻棗陽與其

一

嘉靖十年辛卯秋蝗

嘉靖十三年甲午夏蝗大疫

嘉靖十七年戊戌夏四月大雨沙河擁異物如龜人多漂沒

嘉靖十八年己亥秋大旱

嘉靖二十二年癸卯夏六月大雨溪水溢流石數十里兩月始霽

嘉靖二十五年丙午蛟見泮池黃龍岡產芝

嘉靖三十一年壬子夏大雨雹

並見萬曆襄陽志

嘉靖三十八年己未蛟復見泮池

舊志

嘉靖四十年辛酉天雨墨池魚盡死食之多殺人

重修棗陽縣志

卷之十五

祥異

十

嘉靖四十四年乙丑大饑

嘉靖四十五年丙寅秋九月大風拔木

穆宗隆慶三年己巳大雨傷禾

隆慶四年庚午大饑人食樹皮

神宗萬曆元年癸酉春大疫

懷宗崇禎三年庚午冬十二月地震有聲

崇禎四年辛未縣民王氏女及笄忽變爲男子

並見襄陽志

崇禎十一年戊寅蛟見於宣文閣歲大饑

崇禎十二年己卯仍饑

崇禎十三年庚寅蝗蝻並作食苗殆盡十四年大饑人相食
崇禎十六年癸未斗米錢八千

國朝順治_{乙酉年}仲夏大疫人相食

順治三年丙戌夏大疫

順治十三年丙申冬十月十八日雨冰著樹如甲

順治十八年辛丑夏不雨至於秋

康熙九年庚戌旱疫次年疫

乾隆七年壬戌夏秋水災

重修棗陽縣志

卷之十五

祥異

十一

乾隆十年乙丑夏秋水十_{丙寅秋}秋水災十七年壬申水

並見湖北通志

乾隆三十三年戊子旱民多饑死

乾隆四十三年戊戌旱災

乾隆五十年乙巳旱冬清潭火

舊志火毬如斗飛半里外溪上大桐樹須臾而盡

乾隆五十一年丙午春饑民採樹皮石麪爲食夏麥有秋大
疫流行民病不能穫秋七月飛蝗蔽日不成災

乾隆六十年乙卯知縣王廷珪禁民間門榜冠服用白

嘉慶元年丙辰春三月有黑氣自東來飛向西南啐嘹有聲
嘉慶七年壬戌有秋

嘉慶十年乙丑冬十二月大雪沍寒冰厚五尺

嘉慶十一年丙寅大有年次年丁卯旱

嘉慶十八年癸酉大旱

嘉慶十九年甲戌饑疫斗米千錢

嘉慶二十年乙亥冬十一月大雪

嘉慶二十一年丁丑夏六月大雷電以風伐屋拔木蛟見鸚
鵝水

重修棗陽縣志

卷之十五

祥異

十二

見襄陽志

道光三年癸未夏六月朔日食晝晦星斗畢見

道光五年乙酉有大星頭如箕身如龍長十餘丈自東而西

白光燭地

道光八年戊子秋七月螟螣害稼

道光十四年甲午旱蝗

道光十九年己亥元旦雷震

道光二十五年乙巳夏石橋民劉凱家螺生駒

道光二十六年丙午夏四月徐家橋椿樹花大如茶盃一黃

二赤

道光二十七年丁未秋旱饑

並見舊志冊檔

領刻字江西饒文耀全刊
漢陽光雲

重修棗陽縣志

卷之十五

祥異

十三